

摘藻堂四庫全書薈要

集部

欽定四庫全書薈要

集部

湛然居士集

原序
卷一
二

臣董誥詳校
詳校官助教臣謝登雋



御製讀耶律楚材扈從羽獵因有詠

耶律本遼種所事又元君不可忘其初未宜徒脩文况
實君倚重卓為開國臣居然廢弓矢何以示同羣味其
稱儼欲似漢人寬衣而博帶恥與武夫倫設在趙
固當如是云匪徒薄耶律戒後意良勤

詩
子昂

欽定四庫全書薈要

湛然居士集

提要

臣等謹案湛然居士集十四卷元耶律楚材撰楚材字晉卿遼東丹王八世孫金尚書右丞履之子元太祖定燕聞楚材名召見大喜處之左右官至中書令追封廣寧王謚文正事蹟具元史本傳是集所載皆詩而稍以書

序碑記錯雜其中編次頗為叢雜史稱其旁

通天文地理術數及二氏醫卜之說宜其多

所發揮而文止於斯不敵詩之三四知其必

有佚遺也楚材事元太祖太宗開國規模皆

所創定稱一代元勳而詩筆頗質率且嘗受

法於萬松老人尤多禪悅之語蓋其志存遠

大不屑屑以詞藻擅長故乘興搗毫不過藉

以自抒情性然其中如贈李郡王筆寄平陽

潤老和陳秀玉韻河中遊西園壬午元日諸
詩王士禎稱其頗有風味為錄入池北偶談
中蓋天姿既高寄托自遠其自然之趣固有
未易及者耳乾隆四十三年正月恭校上

總纂官臣紀昀臣陸錫熊臣孫士毅

總校官臣陸費墀

湛然居士集原序

夫文章以氣為主浩然之氣養於胸中發為文章不期
文而文有餘矣古之君子其文見於簡策宏深渾厚言
近而旨遠辭約而義深非後世以雕篆為工者所能比
蓋其浩然之氣貫於中也諸葛孔明暨近代范文正公
懷王佐之才有開物成務之畧自任天下之重初不欲
以文名世然出師一表可與伊訓說命相表裏而萬言
一書議者亦比於管仲樂毅二子者豈嘗學為如此之

文也哉其忠義之氣形之於文亦不自知其所以然也
嗚呼世之作文者非不衆也言語非不工也及其建功
定業任大持重不若昔之人者其胸中所養者小也今
吾湛然居士其庶幾乎公當聖朝開叛之際膺鹽梅鼎
鼐之任仰贊天子茂宏德威臣上古所不臣之國籍禹
貢所不籍之地公之功業著見於天下炳如日星雖月
氏殊俗蠻荆遠方莫不仰戴其威名觀其從事征討軍
務倥偬宜其不暇留意於文字間然雄篇傑句散落人

間復如彼其多或吟咏其情性或託意於玄機千彙萬
狀會歸於正又皆肆筆而成若不用意為者人雖服其
精敏意者何為而能然耶殊不知公善養其浩然之氣
充於其中形於言動發於功業見於文章有不得不然
者矣孔子曰有德者必有言其是之謂乎邇者中書省
都事宗公仲亨更新此集募工鏤板過雲中同監納樊
子通見屬為序微以為文章者公之餘事也公之德業
天下共知之固不待文而顯也其文天下共傳之又奚

待以序而彰哉雖然不為之辭者微東城一鄙人也幸
齒於門下士之末若復獲挂名於文集中固所願也於
是乎書癸巳年十月晦日九山居士李微子微序

乾坤之運否之則塞泰之則通日月之光蒙之則晦廓
之則明聖人之道鬱之則滯推之則行化而裁之謂之
教神而明之存乎人天之未喪斯文陰有所主宰亦有
所託付數不終隱待其人而益宏况乎啟端發源於新
造之初措傾柱邪於積亂之後以任當世之重以行衆

人之難必有命世大賢超人異行舉歷代非常之事卒
前哲未成之志與時標準卓然為吾道之倡夫道之不
明久矣去古而今呂情其性典謨遠而淳風衰雅頌息
而淫辭作以大學中庸為虛位以致知格物為迂論聖
門閉而不開正路梗而莫辟加之兵革以來百餘年間
宇宙之內昏昏默默如夜之未晝夢之未寤醉之未醒
病之未藥伏陰未覩於太陽寒谷未熙於春律黎苗之
渴望未蘇黔首之倒懸未解夫欲濟塗炭而域仁壽滌

瑕穢而鏡澄清療國脈之膏肓補天維之罅漏草創萬
有權輿百度興禮樂於板蕩之際拯詩書於煨燼之餘
黼黻皇猷經緯政體變干戈而俎豆易荒服而衣冠斲
雕反樸鑄頑成仁扇美化以風六合沛膏澤以雨群生
教續將絕之時功畫無形之世非天下之至神其孰能
與於此哉惟我中書湛然居士天姿英挺上智誠明著
龜其識鈞鼎其器聳四方之具瞻過千載之嘉會作朝
廷之翰維社稷之楨牢籠區夏宰制山川提封不牧之

邦郡縣不毛之地正璣衡而泰階平明厯數而靈符定
開元建極盡彌綸之術驟帝馳王入酬酢之計以唐虞
吾君為遠圖以成康吾民為己任涵養於事業形容於
文章得之心不受一塵應之手自能三昧游戲妙場掀
揭理窟運天地之橐籥奪造化之機緘論性則窮其深
源談道則索其隱旨以聖經為根本故其文體大而精
微以史氏為枝葉故其文氣焰而宏麗盤誥訓誓其格
言詠歌比興其奧義雖出師征伐之間猶銳意經濟之

學觀其投戈講藝橫槊賦詩詞鋒挫萬物筆下無點俗
揮灑如龍蛇之肆波瀾如江海之放其力雄豪足以排
山嶽其輝絢爛足以燦星斗幹旋之勢雷動飈舉溫純
之音金聲玉振片言隻字冥合玄機竒變異態靡有定
跡負乎出於見聞之外鏗鉤炳耀盪人之耳目所謂造
物有私默傳真宰胸中別是一天爾蓋生知所稟非學
而能如庖丁之解牛游刃而餘地公輸之制木運斤而
成風是皆造其真境至於自然而然公之於文亦得此

不傳之妙若夫湛然之稱不可以形尋不可以言詰其處之也厚其資之也深靜於內為善淵演於外為道脈即其性而見其文與元氣俱粹然一出於剛正觀夫所稱其人可知矣然則作之者創于始亦在乎述之者成其終適有中省都事宗仲亨最為門下之舊收錄公之餘藁纖悉無遺今又增補雜文誠好事之君子舉其全帙付之於門下士高冲霄李邦瑞協力前修作新此本以示學者可謂兼善之用心省丞相胡公喜君之文揄

揚溢美勒成為書中有或悞者更加釐正命工刊行于世益廣其傳真得仁人之雅意省察王子卿李君實許進之王君玉薛正之皆欣然響應共贊成之二公承宗公之志畢其能事同諸君繫求為序僕以兵塵中來舊學荒廢不敢應命蓋公之心術至蹟不能盡探之於文公之文章高致不能具陳之於序雖其文皆公之寓言筌蹄而忘象是亦勲業之餘蘊公如不言則人將何述焉嘗謂雲漢為章天之文言辭可法人之文故觀乎天

文以察時變觀乎人文以化成天下文之為用大矣哉
今公之為言非徒示虛文而已實救世行道之具所以
柱石名教綱紀彞倫鼓舞士風甄陶人物豈惟立當代
之典章端可為將來之軌範於戲大禹不治水吾民憂
其魚孔子不作經王道幾乎熄夫以文德開通濟物密
藏諸用扶持聖道之久弊幽而復顯見天意之所屬為
時求定而能樹治本遏亂源活生靈福奕世其功德無
慚于先聖斯文之不墜皆公之力焉是言也非獨予之

所言迺天下之公言也歲次癸巳十有二月初吉襄山
孟攀鱗序

士君子困而後學老乃思歸博奕之流猶賢乎已屏山
年二十有九閱復性書知李習之亦二十有九參藥山
而退著書大發感嘆日抵萬松深攻亟擊退而著書三
十餘萬言內藁心學諄諄大半晞顏早立亞聖生知追
繹先賢誠難倒指湛然居士年二十有七受顯訣于萬
松其法忘死生外身世毀譽不能動哀樂不能入湛然

大會其心精究入神盡棄宿學冒寒暑無晝夜者三年
盡得其道萬松面授衣頌目之為湛然居士從源自古
宗師印證公侯明白四知無若此者湛然從是自稱嗣
法弟子從源自古公侯承稟宗師明白四知亦無若此
者萬松一日過其門見執菜根蘸油鹽飯脫粟萬松曰
子不太儉乎曰圍閉京城絕粒六十日守職如恒人無
知者以至扈從西征六萬餘里歷艱險困行役而志不
少沮跨崑崙瞰瀚海而志不加客問其故而曰汪洋

法海涵養之力也若乃詈聖安而成贊戲清溪而發機
行九流而止縱橫立三教而廢邪偽外則含弘光大禦
侮敵國之雄豪內則退讓謙恭和好萬方之性行世謂
佛法可以治心不可以治國證之於湛然正心修身家
肥國治之明効吾門顯訣何愧于大學之篇哉湛然嘗
以此訣忠告心友時無識者慨然曰唯屏山閑閑可照
吾心耳噫嘻雖欲普慈兼濟天下後世末由也已嘗和
友人詩曰贈君一句直截處只要教君能養素但能死

生榮辱哀樂不能羈存亡進退盡是無生路至於西天
三步遠東海一杯深老作衲僧未易及此使裴公美張
無盡見之當斂衽焉蓋片言隻字出於萬化之源膚淺
未臻其奧者方且索之於聲偶鍛鍊之排正如檢指蒙
學對句之牧豎望涯於少陵詩史者矣加以志天文而
革西歷翫焦桐而贊南風在變理為難能皆湛然之餘
事或謂萬松濶論無乃夸誕乎曰王從之雷晞顏王禧
伯尚不肯與屏山閑閑形於論辯萬鍛炎鑪不停蚊蚋宜

乎予之難信也吾待來者千載一人豈獨為子設耶甲
午年仲冬晦日萬松野老行秀中夜秉燭序

夫文章天下之公共言賦者自以與賈馬爭麗則言詩
者自以與李杜爭光焰逞辭藻者不讓蘇黃恃歌詞者
輒輕吳蔡以至氣衝雲霄而莫肯相下及其較量長短
探賸妍醜得其全者鮮矣厭人望者鮮矣中書湛然性
稟英明天然之才或吟哦數句或揮掃百張皆信手拈
來非積習而成之蓋出於胸中之穎悟流於筆端之敏

捷味此言言語其溫雅平淡足以潤金石其飄逸雄
健足以薄雲天如寶鑑無塵寒水絕翳其照物也瑩然
向之所言賈馬麗則之賦李杜光焰之詩辭藻蘇黃歌
詞吳蔡兼而有之可謂得其全矣厭人望矣外省官府
得居士文集古律詩雜文五百餘首分為九卷恐珠沉
於海玉隱於山而輝彩未著特命良工板行於世使四
方士大夫如披雲覩日快願見之心嗚呼言者心聲也
中書之言自詠物之外多以國事歸美為章句雖稷契

之忠臯陶之嘉未易過此癸巳歲十二月望日平水冰
巖老人王鄰序

欽定四庫全書薈要卷一萬六千一百三

集部

湛然居士集卷一

元

耶律楚材

撰

和黃華老人題獻陵吳氏成趣園詩

和平陽王仲祥韻

和李世榮韻

和李世榮見寄

和李世榮韻

再用其韻

又索六經

和耶律繼先韻三首

和薛伯通韻

鹿尾

過金山用人韻

過雲中贈別李尚書

和裴子法韻

和許昌張彥升見寄

和南質張學士敏之見贈七首

和張敏之鳴鳳曲韻

和孟駕之韻

和陳秀玉繇梨詩韻

和冀先生韻

和黃華老人題獻陵吳氏成趣園詩

雪溪詞翰輝星斗紙蠹塵蒙詩一首湛然揮墨試續貂
躡嚙使人難出口丁年彭澤解官去遨遊三徑真三友

悠然把菊見南山暢飲東籬醉重九獻陵吳氏治荒園
成趣為名良可取養高不肯事王侯閒卧林泉了衰朽
今年扈從過秦川可憐尚有蕭條柳歸計甘輸吳子先
麗詞已後黃華手知音誰聽斷弦琴臨風痛想紗巾酒
嗟乎世路聲利人不知曾憶淵明否

和平陽王仲祥韻

一聖揚天兵萬國皆來臣治道尚玄默政簡民風純明
明我嗣君寬詔出絲綸洪恩浹四海聖訓宜書紳逆取

乃順守皇威輔深仁貪饕致天罰長吏永良循河表背
盟約羽檄飛邊塵聖駕親徂征將安億兆人湛然陪扈
從書劍猶隨身翠華次平水草木咸生春冰岩上新句
文質能彬彬冰雪相照映珠玉如橫陳詩筆君獨步唐
都一逸民聖政罔二三裁物惟平均綜名必核實求儒
務求真經術勿踈廢筆硯常可親竚待寰宇清園丘祀
天神選舉再開闢仲祥當超倫一旦騰達時獻策空詵
詵

和李世榮韻

聖主光華旦熊羆百萬強兵行從紀律敵潰自奔忙百
谷朝滄海羣陰畏太陽黎民歡仰德萬國喜觀光堯舜
規模遠蕭曹籌策長巍然周禮樂盛矣漢文章神武威
兼德徽猷柔濟剛自甘頭戴白誤受詔批黃我道將興
啟吾儕有激昂厚顏懸相印否德忝朝綱佐主難及聖
為臣每願良翠華來北闕黃鉞討南疆明德傳雙葉寬
仁洽萬方九服無不軌四海願來王兵革雖開創詩書

何可忘洪恩溥曉露嚴令肅秋霜符應千齡運功垂萬
世昌綿綿延國祚煜煜受天祥多士咸登用羣生無敗
戕此行將告老松菊未全荒

和李世榮見寄

雲橫北海西驛騎來天際梅軒真可人新詩遠相惠其
聲若良金其臭如芳蕙文艷理無華詞雄言不侈筆力
似黃山驚浪雲奔勢犀象牙角新蠶鋒鋌尾細遙想醉
銜盃梅塢清陰翳閑散玉麒麟可得羈而係吾子卧東

山誰治今之世好陳十漸書每用六奇計萬里入龍廷
何須嘆迢遞時方涉大川舟楫須君濟

和李世榮韻

多謝梅軒不惜春聲詩來寄格清新詞源莫測波千頃
筆力能扛鼎萬鈞憂國心情常悄悄閑居容止自申申
誰知板蕩中原後瀟灑河東有若人

再用其韻

梅軒相別又三春別後文章與日新不忿散材需造化

好將幽隱入陶鈞我遊北海年垂老君卧南陽志未伸
遥想冰魂政無恙一枝迴施隴頭人

又索六經

我愛平陽李世榮一番書史再鐫銘欲令吾子窮三傳
故向君家乞六經簡冊燦然新制度文章宛爾舊儀刑
莫教幼穉空相憶日日求詩到鯉庭

和耶律繼先韵三首

澤民我愧無術略且着詩鴻慰離索詩書滿載升金山

絃歌不輟踰松漠世上原無真是非安知今是而非昨
連城美玉涅不緇百鍊真金光愈爍已悟真如匪去來
自然胸次絕憂樂斷夢還同世事空浮雲恰似人情薄
尚記吾山舊隱居松風蕭瑟松花落枕流漱石輕軒車
吟烟嘯月甘藜藿春山寂寂春溪深蕭條庭戶堪羅雀
而今不得安踈慵自笑條籠困鷓鴣勉力龍庭上萬言
男兒志不忘溝壑

其二

當年不肯讀三略獨抱遺經伴閒索流行坎止不尤人
自甘萬里涉窮漠富貴榮華能幾時生死都來如夢昨
千年興廢漚浮沉百歲光陰電飛爍常笑梁鴻歌五噫
竊學禁啟彈三樂未能仁義戢干戈勉將敦厚懲澆薄
近有人從故隱來黃花無限開籬落問渠血肉與丘糟
奚如麥飯而羹藿又聞麋鹿滿姑蘇阿瞞不復遊銅雀
塗中曳尾希莊龜江夏沉舟悲禰鸚吾山佳處歸休乎
鹿逸平林魚縱壑

其三

祖道門庭元簡略
兒孫草裏添些索
擬心鶴子過新羅
起念白雲橫大漠
迥殊四句有無中
元非三際來今昨
大海纖塵一點飛
洪爐片雪寒光爍
寧論業障本來空
半偈徒誇寂滅樂
細切清風非異事
更將明月剗來薄
玲瓏四面亦無門
充塞十方絕壁落
羅列珍羞渠不食
癡人猶自貪藜藿
祇圖龍頷摘明珠
誰知虎口存活雀
坐脫猶迷一色邊
崎嶇鳥道一作去路
橫秋鷲可笑人間荆

棘林死者填溝空塞壑

和薛伯通韻

滴滴秋光溢遠山穹廬寥落酒瓶乾

一作塞天空
澗鴈聲乾

詩章

平淡思居易禪理縱橫憶道安不念西風霜葉脫難禁
秋雨菊花殘間山舊隱天涯遠夢裡思歸夢亦難

鹿尾

鑿輿秋獮獵南岡鹿尾分甘賜尚方濃色殷殷紅玉髓
微香馥馥紫瓊漿韭花酷辣同葱薤芥屑差辛類桂薑

金匱山房全書
卷一
何似蘊根蘸濃液邀將詩客大家嘗

一作流匙滑
餘大家嘗

過金山用人韻

雪壓山峰八月寒羊腸樵路曲盤盤千岩競秀清人思
萬壑爭流壯我觀山腹雲開嵐色潤松巔風起雨聲乾
光風滿貯詩囊去一度思維一度看

過雲中贈別李尚書

誰識雲中李謫仙詩如文錦酒如川十畝良園君有趣
一塵薄土我無緣舊恨常來春夢裡新吟不到客愁邊

明朝分手天涯去他日相逢又幾年

和裴子法韻

并序

頃觀子法跋白蓮社圖斥淵明攻乎異端吾子不
惑所學主張名教真韓孟之儔亞也昔巢由避天
下而遠遁堯舜受天下而不辭以致澤施於萬世
名垂於無窮是知潔已治天下各有所安耳夫清
虛玄默樂天真而自適者也焦勞憂勤濟蒼生為
已任者也二道相反甚於冰炭使堯舜巢由易地

則皆然後世之亂臣賊子窺伺神器狐媚孤兒寡婦托其喉以取天下者聞巢由之風亦少知媿矣然則巢由之功豈可少哉棄享天下之大樂而且希物外之虛名者豈人情也邪文中子有言虛玄起而晉室亡斯豈莊老之罪與盖用之不得其宜也以虛玄之道治天下其猶祁寒御單葛大夏服重裘自底斃亡豈裘葛之罪哉昔晉武一統之始不為後世之遠謀何曾已識之既而禍難繼作骨

肉相殘屠戮忠良進用讒佞雖元凱復生亦不能
善其後矣大厦將頽非一木所能支獨淵明何能
救其弊哉適丁天地不交萬物不通君子道消小
人道長之時淵明見幾而作掛印綬而歸結社同
志安林泉之樂較之躁進苟容於小人之側者何
啻九牛一毛耶以淵明之才德假使生於堯舜湯武
之世又安知不與臯夔伊周並驅爭先哉宣尼有
云用之則行舍之則藏又云進退存亡不失其正

者其唯聖人乎斯亦名教之內昭昭可考者也何

責淵明之深也余嘗謂否則卷而懷之以簡易之

道治一心達則擴而充之以仁義之道澤四海實

古今之通誼也因用子法遊姑射元韻以見意云

達磨一派未西來無限勞生眼未開六朝繁盛已矣耳

兩晉風流安在哉自笑中書老僕射

引韻借用此事

事佛竊做

王安石公案翻騰舊葛藤林泉准備閒踪跡用之勲業

垂千秋發揚孔孟誰為儔舍之獨善樂真覺賦詩舒嘯

臨清流豈止淵明慕松菊晉室高賢十八九君子道消
小人用貞夫遠棄逃名酒蘇黃冠世能文詞裴張二相
名當時祖道禪林恣遊戲堯風舜德甘噓吹達人不為
造物役打破東西與南北毛吞巨海也尋常出沒縱橫
透空色真如頗與羲易同不動確乎無吉凶湛然信筆
書竊語臨風遠寄綠野翁贈君一句直截處祇要教君
能養素但能死生榮辱哀樂不能羈存亡進退盡是無
生路

和許昌張彥升見寄

真人休運應千載生知神武威中邦杜絕竒技賤異物
連城玉斗曾親撞兵出潼關渡天塹翠華雜映騶虞幢
生民歌舞嘆奚後壺漿箠食轅門降偏師一鼓汴梁下
邏騎飲馬揚子江良臣自有衛鄭輩死諫安用干與逢
少微昨夜照平水清河國士真無雙壯歲遊學力稽古
孜孜繼晷焚蘭釭新詩寄我有深意再三舒卷臨幽窓
安得先生贊王室委倚奚憂庶政厖看笑紛紛匹夫勇

徒誇巨鼎千鈞扛，何日安車蒲輪詔公入北闕。葡萄佳

釀爛飲玻璃缸。

西人葡萄釀皆貯以玻璃瓶

和南質張學士敏之見贈七首

桃源劉鳳樓，蕭鐫冰斲玉。哦通宵珠璣，錯落照蘭室。龍
蛇偃蹇蟠霜綃，和我新詩使予起。却得瓊瑰酬木李，邊
城十載絕知音。琴斷七絃鶴亦死，而今得識君姿容。胸
中鬱結渙然空，詩壇君可據上位。筆力我甘居下風，筆
陣文場寬且綽。馳騁看君能矍鑠，學海波瀾千頃波。厭

飫經書爛該博幾時把手瀟湘邊生涯自有壺中天鳴
榔一笑舟浮蓮滄波萬里凝碧烟

其二

漏沉沉竹蕭蕭蒲團禪定坐終宵古廟香爐無氣息一
條白練如瓊綃性海澄澄波不起宛似冰壺沉玉李庸
人泥教不知歸七竅鑿開混沌死雖云至道絕音容不
離幻有成真空百尺竿頭更移步普天匝地生清風大
用全提自寬綽裨將交鋒何矍鑠醒時呼起夢中人徧

濟含生其利博本無內外與中邊踏破威音劫外天汚
泥深處種青蓮昇平世界沈烽煙

其三

雨蕭蕭風蕭蕭對床談道徹清宵欲畫太虛無面目慎
無落筆汚冰綃人間平地風波起反笑於陵噉螬李富
貴榮華都幾時迷者孰能死前死須彌芥子云相容神
通妙用不空空劫火洞然渠不壞紙鳶能禦毗藍風龍
象騰驤何綽綽迴視駑駘空矍鑠悟時一語透塵沙安

用才學恃宏博維摩方丈傍無邊箇中無礙散花天迴
途穩穩步雙蓮得玄鳥道橫晴煙

其四

院深深籟蕭蕭伽陀舒卷度蘭宵若解荷心繫珠露便
能天外裁雲綃大覺空生一漚起悟斯獨有屏山李屏山

居士李之純嘗作楞嚴別解為禪客所重

穿透楞嚴第一機方信庵中人不

死个裡家風針不容夢迴六趣大千空道人受用本無
盡明月薄削細切風香象朋從威綽綽獨跳狂獐空嬰

鑠悲心起處了無私濟渡塵沙恩廣博不涉中流離兩
邊下無大地上無天無人無佛臺無蓮淒淒碧草生芳
煙

其五

雲飄飄水蕭蕭一燈香火過閒宵神清半夜不成夢書
帷風細揚微綃運應昌期王者起自愧文章翰杜李竊
同居易了無生誰羨葛洪學不死一榻蒲團膝足容脩
然丈室塞虛空翻騰密藏明佛日陶汰機緣振祖風丹

鳳冲霄何綽綽失曉獸郎徒矍鑠人間取捨本千差世
路窮通如六博幽人嘯咏水雲邊劫外光風自一天閒
來石上栽紅蓮水無波浪火無煙

其六

風蕭蕭雨蕭蕭蕭蕭風雨悲涼宵籬菊殘英漬黃玉林
風脫葉飄紅綃幽人展轉凌晨起邂逅門前逢短李殷
衰聞道有三仁欲說九疇君不死穹廬相語為從容懸
河雄辨能談空風神蕭散野鶴立照人玉樹臨秋風落

筆新詩一揮綽不似武人誇矍鑠銀鈎筆力掩二王
照夜連城肯輕博他年相約秋山邊秋江一派連秋天
閒聽菱女歌採蓮輕舟一醉眠秋煙

其七

衣龍鍾鬢飄蕭穹廬停燭坐寒宵翰林遣介贈佳句
蠶芒鳥跡書生綃既倒狂瀾再扶起昔有謫仙原姓李
今日龍庭忽見君誰道當年太白死文章氣象難形容
騰龍翥鳳遊秋空筆力萬鈞神鬼泣雷轟電掣驅疾風
餘

裕喜君能綽綽鼓舞為君子矍鑠解讀奇字笑揚雄識
壓張華能物博與君握手天山邊舉觴相囑望青天他
年雅社結白蓮林泉杖屨衝雲煙

和張敏之鳴鳳曲韻

寫蛟螭咳珠璣英姿元棟

一作占

碧梧棲彬彬文彩自光

輝有材希晉用失志欲劉依薦君誰肯惜吹噓洪才大
筆識君稀鯤遊翻海震鵬舉翥天飛問渠蟾窟攀仙桂
何似冥山破鐵圍人間強認假生死世上本無真是非

濃歡殫春夢晚景嘆殘暉夢斷日沈真可笑輸却禪人
向上機遮眼開經卷蒙頭壞衲衣息念融凡聖無心應
順違震風威橫擔柶標萬山歸

和孟駕之韻

平陽聞有鄒人孫封書上我僅萬言討論墳典造極致
商確古今窮深源文章高出蘇黃輩英雄不效秦儀志
志圖仁義濟元元冀北無雙瑚璉器淪落塵埃德不孤
梅軒結友天一隅我昔鹽車困騏驥騰驤未得踏亨塗

甕牖繩樞甘儉薄詩腸雷轉充糟粕他日佳聲聞九天
富貴之來不得却丁年黃卷樂平生鄉閭一諾千金輕
滄浪清處閒濯纓才名高價如連城筆下有神詩有眼
五車書史窮編簡一舉高登甲乙科曾對閭闔持手版
天兵一鼓下睢陽旌旗整整陣堂堂玉石俱焚君子隱
北度來依日月光徒步黃塵千里遠猶抱遺經究微婉
天產昂藏一丈夫三十未遇非為晚聞望卓冠儒林叢
燦然星宿羅心胸馳驟大方孰並駕絕塵奔逸其猶龍

君似昆吾玉可切昆吾不是尋常鐵利穎神鋒人未知
寶匣空閒三尺雪何時搜出螭龍鞭一聲霹靂轟青天
歲旱須君作霖雨拔茅進用其茹連天子明堂求國棟
鵬飛全藉天風送鳳池波暖百花新泳游不作江湖夢
和陳秀玉繇梨詩韻

石門九月西風高

梨出於石門
之北遵化縣

繇梨萬樹金垂梢清谿

秀玉道
號也

千里遺贈我籐筐初發香盈包謫仙風度清谿

亞春風曾飲梨花下不用紅粧唱採蓮醉望青天歌二

雅我有斗酒清且醇同君薦此鷺黃新初見分香剖金
卵更看削玉飛霜鱗縹葉紫條何足語夜光安可同魚
目文園塵渴政難禁咀嚼冰雪削香玉

和冀先生韻

東垣士大夫以興王聖德詩見寄用酬雅意

運出三爻兌

以太一推之而得

龍飛九五乾要荒歸化育豪哲

入陶甄有幸恩涵海無私德應天偏師收百越一鼓下
三川天子能身正元戎不自賢重光道同軌累聖德相

聯策決九重內功歸萬乘權羣雄哀稽顙多士尚摩肩
輔弼歸左右丞凝贊後前開夷逾漢武平叛跨周宣冠
帶通窮域車書過古堦覽機雲母障受諫翠華駢款塞
諸蠻洞來朝百濟船降王趨陞闕強敵列氓編淨掃妖
氛變潛消烽火煙詞臣遊館閣幽隱起林泉堯舜文明
盛商姬禮樂全九成合古奏二雅詠新篇世卜千年世
年斯億兆年宗親成蒂固國祚等瓜綿聖政與人頌天
威萬古傳勉旃封禪事不用策安邊

湛然居士集卷一

欽定四庫全書薈要卷一萬六千一百四

集部

湛然居士集卷二

元 耶律楚材 撰

和百拙禪師韻

題平陽李君實吟醉軒

從聖安澄老借書

題西菴所藏佛牙二首

和耶律繼先韻二首

過陰山和人韻四首

再用前韻

復用前韻唱玄

用前韻送王君玉西征二首

用前韻感事二首

過濟源和香山居士韻

和裴子法見寄

用李德恒韻寄景賢

過天德和王輔之四首

槐安席上和張梅韻

思親有感二首

思友人

贈李郡王筆

寄雲中卧佛寺照老

寄平陽淨名院潤老

贈雲川張道人

贊李俊英所藏觀音像

題西菴歸一堂

和景賢還書韻二首

外道李浩求歸再用韻示景賢

外道李浩和景賢霏字韻予再和呈景賢

和楊居敬韻二首

過天寧寺用彥老韻二首

過天山周敬之席上和入韻二首

和人韻

丁亥過沙井和耶律子春韻二首

再過晉陽獨五臺開化二老不遠迎

過清源謝汾水禪師見訪

王屋道中

和百拙禪師

十方世界是全身氣宇如君絕比倫予奪機中明主客
正偏位裏辨君臣眠雲卧月辭三島鼓腹謳歌預四民
了了時誰可曉閒人元不是閒人

題平陽李君實吟醉軒

古晉君實世所知幽軒佳號兩相宜
長鯨海量嫌甜酒彩筆天才厭小詩
七步賦成文燦爛千鍾不惜錦淋漓

一作千鍾飲徹

何當杖屨遊平水得預君家吟醉時

從聖安澄老借書

湛然寤語寄西堂此箇因緣果異常
陽老十門剛結案欽公五派彊分臧
劍逢劍客須拈出詩遇詩人何必藏
居士病多諳藥性聖安得效不傳方

題西菴所藏佛牙二首

殷勤敬禮辟支牙緣在西菴居士家
午夜飛光驚曉月六時騰焰燦朝霞
一番頂帶因初結七轉生天果不差
庸士執方猶未信防風安得骨專車

又

旃檀奩裏貯靈牙來自中天尊者家
瑩色冷欺秋夜月真光明射晚晴霞
本同舍利元無別疑是金剛事有差
猶憶廣長舌左右咀嚼風雨震雷車

和耶律繼先韻二首

舊山盟約已愆期一夢十年盡覺非
瀚海路難人去少
天山雪重鴈來稀
漸驚白髮寧辭老
未濟蒼生曷敢歸
去國遲遲情幾許
倚樓空望白雲飛

又

不事王侯懶屬文
時危何處覓元勳
他年收拾琴書去
笑傲林泉我與君

過陰山和人韻四首

陰山千里橫東西，秋聲浩浩鳴秋溪。
猿猱鴻鵠不能過，天兵百萬馳霜蹄。
萬頃松風落松子，鬱鬱蒼蒼映流水。
天丁何事誇神威，天台羅浮移到此。
雲霞掩翳山重重，峰巒突兀何雄雄。
古來天險阻西域，人烟不與中原通。
細路縈紆斜復直，山角摩天不盈尺。
溪風蕭蕭溪水寒，花落空山人影寂。
四十八橋橫鴈行，勝遊竒觀真非常。
臨高俯視千萬仞，令人凜凜生恐惶。
百里鏡湖山頂上，旦暮雲烟浮氣象。
山南山北多幽絕，幾派飛泉練千丈。

大河西注波無窮千溪萬壑皆會同君成綺語壯奇誕
造物縮手神無功山高四更纔吐月八月山峰半埋雪
遙思山外屯邊兵西風冷徹征衣鐵

其二

羸馬陰山道悠然遠思寥青巒雲靄靄黃葉雨蕭蕭未
可行周禮誰能和舜韶嗟吾浮海粟何礙八風飄

其三

八月陰山雪滿沙清光凝目眩生花插天絕壁噴晴月

擎海層巒吸翠霞松檜叢中疏畝畝藤蘿深處有人家
橫空千里雄西域江左名山不足誇

其四

陰山竒勝詎能名斷送新詩得得成萬疊峰巒擎海立
千層松檜接雲平三年沙塞吟魂遯一夜羶穹客夢清
遙想長安舊知友能無知我此時情

再用前韻

河源之邊鳥鼠西陰山千里號千溪倚雲天險不易過

駟蹕蹕感追風蹄簽記長安五陵子馬似遊龍甲如水
天王赫怒山無神一夜雄師飛過此盤雲細路松成行
出天入井實異常王尊疾驅九折坂此來一顧應哀惶
崢嶸突出峰峭直山頂連天纔咫尺楓林霜葉聲蕭騷
一鴈橫空秋色寂西望月窟九譯重嗟乎自古無英雄
出關未盈十萬里荒陬不得車書通天兵飲馬西河上
欲使西戎獻馴象旌旗蔽空塵漲天壯士如虹氣千丈
秦皇漢武稱兵窮拍手一笑兒戲同塹山陵海匪難事

剪斯羣醜何無功
騷人羞對陰山月
壯歲星星鬢如雪
穹廬展轉清不眠
霜匣閒殺昆吾鐵

復用前韻唱玄

天涯流落從征西
寒盟辜負梅花溪
昔年學道頗得趣
魚兔入手忘筌蹄
殘編斷簡披莊子
日日須當誦秋水
誰知海若無津涯
河伯源流止於此
人間醬在紙數重
太玄強草啗揚雄
高卧蒿萊傲唐室
清風千古獨王通
曲者自由直者直
何必區區較繩尺
一筆劃斷閒是非

萬事都忘樂岑寂功名半紙字幾行競羨成績書太常
只知牢筴饗菽豢不思臨办心悲惶何如打坐蒲團上
參透昇平本無象一餅一鉢更無餘容膝禪菴僅方丈
從教人笑徹骨窮生涯元與千聖同鳥道雖玄功尚在
不如行取無功功歸來踏破澄潭月大冶洪爐飛片雪
且聽石女鳴巴歌萬里一團無孔鐵

用前韵送王君玉西征二首

湛然送客河中

西域城名也

乘興何妨過虎溪清茶佳菓

餞行路遠勝濁酒烹駝蹄結交須結真君子君子之交
淡如水一從西域識君侯傾蓋交歡忘彼此當年君卧
東山重守雌默默元知雄五車書史豈勞力六韜三畧
無不通詩詠珠璣無價值青囊更有琴三尺奉命西來
典重兵不得茅齋樂真寂魚麗大陣兵成行行師布置
非尋常先生應詔入西域一軍駭異皆驚惶武皇習戰
昆明上欲討昆明致犀象吾皇兵過海西邊氣壓炎劉
千萬丈先生一展才略窮百蠻冠帶文軌同威德洋洋

震天下大功不宰方為功
隱居自有東山月風拂松花
落香雪退身參到未生前
方信秤鎚元是鐵

其二

先生應詔將征西湛然送客涉深溪徘徊一舍未忍去
兵車暫駐天駒蹄猶憶今春送君子桃李無言映流水
寒暑推遷奈老何秋風革律重來此關山險僻重復重
西門雪恥須豪雄定遠竒功正今日車書一混華夷通
先生純德如矢直詎為直尋而枉尺功成莫戀聲利場

便好回頭樂玄寂故山舊隱松千行奇峯怪石元異常
前日盟言猶在耳猿鶴思怨空悲惶我擲直鈎魚不上
須信遊鱗畏龍象冥鴻一舉騰秋空誰羨文章光萬丈
道兮人作非天窮區區何必較異同語默行藏在乎我
退身奚論無成功安東幸有閭山月萬頃松風萬山雪
收拾琴書歸去來修心須要金成鐵

用前韻感事二首

稱斤甘薺賣京西誰信無人採五溪鵬異衆禽全六翮

麟殊凡獸具五蹄昔年學道宗夫子盈科後進如流水
蟄龍猶未試風雷萍泛蓬飄而至此襁袍甘分百結重
不學亂世姦人雄忘憂樂道志不二守窮待變變則通
歲寒松柏蒼蒼直摩雲直待高千尺桃李無言蹊自成
此君冷淡人何寂生平恥與噲伍行杜門養拙安天常
澤民致主本予志素願未酬予恐惶否塞未能交上下
何日亨通變爻象不圖廊廟為三公安得林泉參百丈
居士身窮道不窮庸人非異是所同筆頭解作萬言策

人皆笑我勞無功流落遐荒淹歲月贏得飄蕭雙鬢雪
謀生太拙君勿嗤不如嗣宗學鍛鐵

其二

金烏日日東飛西滔滔綠水流長溪流波一去不復返
逐日恨無八駿蹄窮理達生獨孔子嘆夫逝者如斯水
歲不我與其奈何兩鬢星星尚如此曩時鑿破藩垣重
澤民濟世學英雄風雲未會我何往天地大否途難通
霜匣神劍蒼龍直切玉如泥長數尺利器深藏人未知

豐城埋沒神光寂讀書一目下數行金石其心學王常
學術忠義兩無用道之將喪予憂惶有意攀龍不得上
徒勞牙角拔犀象唯思仁義濟蒼生豈為珍羞列方丈
簞瓢陋巷甘孤窮鴻鵠安與燕雀同天與之才不與地
反令豎子成其功安得光明依日月功名未立頭如雪
問君此錯若為多使盡二十四州鐵

過濟源和香山居士韻

覃懷勝遊地濟瀆垂名久忽見樂天吟笑我輸先手麗

詞金石振老筆風雷走乘興試續貂啓我談天口平湖
湧泉注清涼瑩無垢憑檻瞰漣漪風髯塵抖擻龍孫十
萬竿翳翳濃陰厚沁水濟源東天壇王屋右秀色已可
飡何須杜康酒步步搃堪詩佳篇如素有賡酬淡相對
獨有龍岡叟亭上幾徘徊斜陽西入酉晚年歸意切對
此空沈首何日遂初心營居碧林後

一作
碧林

和裴子法見寄

人生都幾何半被功名役一旦燕山破西行過千驛顛

沛不違仁先難而後獲鵷雛捐腐鼠烏鳶其勿嚇扈從
出天山從容遊大石琴書澹相對尚未忘丘索前歲入
關中戈兵克商號明詔典蘭省自愧承深責秦隴成劫
灰京索空陳迹長河尚濁流南山自濃碧把酒酹青天
興亡弔今昔長安非衣君壯年學問積天上玉麒麟英
才可珍惜詩魂素月高飲量滄溟窄清談咳珠玉便腹
筭經籍服君百韵詩謝子萬言策易道已變屯世爻當
應革淮陰正虛襟左車宜籌畫須要蓮峰手乾坤再開

闢昂藏綠野翁真我龍門客

用李德恒韻寄景賢

牢落十年扈御營
瑤琴忘盡水仙聲
酷思詩酒閑中樂
見說干戈夢裏驚
林下因緣千古重
人間富貴一錢輕
此身未退心先退
獨有龍岡識我情

過天德和王輔之四首

天縱吾君大聖人
天兵所指弭烟塵
三齊電掃何須麗
六國雷驅不用秦
誅佞未聞曾請劍
劾姦誰肯試埋輪

伴食黃閣空無輔自笑龍鍾一老臣

其二

六師嚴駕渡長河師不留行誰敢何千里旌旗翻錦浪
一聲金鼓震寒波殷乚誰道三仁在康滅空傳五子歌
唾手要荒歸一統漢唐鴻業未能過

其三

積年叨祿領台司位重才微甚不宜地上流錢慚晏算
樽前決勝愧良帷過實聲聞傳人口似直愚忠結主知

三逕荒涼松菊在他時舍此復何之

其四

慙老先生本素臣洪才大筆力千鈞沽名不築傅巖板
賈世誰垂渭水綸舟泛五湖希范蠡腰懸六印笑蘇秦
韋編三絕耽犧易蕭散風神真隱人

槐安席上和張梅韻

甘薺五溪人不採兩京高價賣秤斤君方淪落羞看我
我亦飄零懶問君人遠空殘眉上黛愁深不整鬢邊雲

誰憐古戍寒牕下
新樣梭成織錦文

思親有感二首

遊子棲遲久不歸
積年溫清闕慈闈
囊中昆仲親書帖
篋內萱堂手製衣
黃犬不來愁耿耿
白雲空望思依依
欲憑鱗羽傳安信
綠水西流鴈北飛

其二

伶仃萬里度西陲
壯歲星星兩鬢絲
白鴈來時思北闕
黃花開日憶東籬
可憐遊子投營晚
正是孀親倚戶時

異域風光恰如故一銷魂處一篇詩

思友人

落日蕭蕭萬馬聲東南回首暮雲橫金朋蘭友音書絕
玉軫朱絃塵土生十里春風別野店五年秋色到邊城
雲山不礙歸飛夢夜夜隨風到玉京

贈李郡王筆

管城從我自燕都流落遐荒萬里餘半札秋毫裁翡翠
一枝霜竹剪瓊琚鋒端但可題塵景筆下安能畫太虛

聊復贈君為土物中書休笑不中書

李郡王嘗為西遼執政

寄雲中卧佛寺照老

像教中微祖意沉盧能嫡子起予深看經不怕牛皮透

公見闍藏教故云

着眼常聽露柱吟行道權居卧佛寺活機特

異死禪心憑君摘取空華實好種人間無影林

寄平陽淨名院潤老

昔年平水便相尋握手臨風話素心刻燭賦成無字句
按徽彈徹沒絃琴風來遠渡晚潮急雨過寒塘秋水深

此樂莫教兒輩覺又成公案滿叢林

贈雲川張道人

雲川道士有詩聲刻篆雕蟲醉未醒素扇自甘贖碧笠
因西人奪笠渠以扇贖之故云玄鶴不肯換黃庭春秋榮悴悲椿木晦
朔生凋笑瑞莫何似擴開真日月區區爍火任熒熒

贊李俊英所藏觀音像

白衣大士足威神蓮智興悲詎可陳金色界中垂萬臂
碧蓮花上露全身鎮州鑄就金難似天竺鑄來玉未真

不識觀音真面目燕吟鶯語過殘春

題西庵歸一堂 并序

搏霄元帥築西菴於廳事之隅以舍沙門建歸
一堂置三聖廟貌屏山居士有云卷波瀾于聖
學之域徹藩籬于大方之家其搏霄之謂乎偶
得亂道韻詩錄呈諸士大夫幸希光和仍請
西菴上人書之楹棟間為他時林下清話張
本云

三聖真元本自同隨時應物立宗風道儒表裏明墳典
佛祖權真透色空曲士寡聞能異議達人
大觀解相融
長沙賴有蓮峰掌一撥江河盡入東

和景賢還書韻二首

居士今年又出關琴書真味伴予閒簡成草略初無意
語闕治擇誤犯顏漆水自慚貽口實龍岡却得破詩慳
衰翁幸乞贖前過一炷清香論八還

其二

淵明幽隱掩柴關琴已亡絃人亦閒靜倚書窓獨寄傲
笑觀庭樹自怡顏五音格外聲何限百草頭邊法不慳
蠹譜斷絃無用處因風得得寄詩還

景賢索絃譜
故有是句

外道李浩求歸再用前韻示景賢

自從一箭透重關觸處忘緣觸處閒莫問羔裘橫毳衲
從教華髮映蒼顏水聲說法起予甚山色呈機不我慳
寄客天涯樂如許問渠何事更南還

外道李浩和景賢霏字韻予再和呈景賢

塵緣劃斷已忘機，布鼓徒敲和者稀。
中隱彊陪人事過，禪心不與世情違。
昔年勲業真堪笑，舊日家山懶欲歸。
我愛北天真境界，乾坤一色雪花霏。

和楊居敬韻二首

自愧才術草芥微，偶然千載遇明時。
唯希一統王家義，何暇重思晁氏危。
仁義且圖扶孔孟，縱橫安肯倣秦儀。
行看堯舜澤天下，萬國咸寧庶績熙。

其二

詔下龍庭萬國歡
野花啼鳥總欣然
熙朝龜卜符千億
聖主龍飛第一年
至道變通皆有數
浮生富貴本由天
誰人得似楊公子
傲世高吟數百篇

過天寧寺用彥老韻二首

十年不得舞衣斑
行盡天涯萬里山
黃閣伴食空皓首
蒼生未濟謾胡顏
新朝兵革征方急
舊隱煙霞尚未還
衮衮簿書塵滿眼
衰翁奚暇謁松關

其二

今日從征亦偶然
天寧遐想思懸懸
貪榮不得還山去
須信衰翁未苦賢

過天山周敬之席上和人韻二首

淪落天涯數十秋
區區班筆早年投
採薇山下慵拈草
洗耳溪邊懶飲牛
振武揚威難射虎
忘機絕慮不驚鷗
當年射策承明殿
未必輕輕輸呂籌

其二

憇馬居延酒半醺
寂寥寒館變春溫
未能鵬翼騰溟海

不得鴻音過鴈門千里雲烟青塚暗一天風雪黑山昏
天涯幸遇知音士仔細論文共一樽

和人韻

四海皇皇無所歸夢魂常繞故園飛海山不羨學居易
華表留言笑令威毛落難尋蘇子節囊空猶有老萊衣
靜思二十年間事擾擾紛紛盡覺非

丁亥過沙井和耶律子春韻二首

科登甲乙戰文圍吾子才名予獨知巢許身心君易樂

蕭曹勲業我難為有恒得見實無憾知己相逢未忍離
攜手河梁重話舊胡然羞和子卿詩

其二

行藏俯仰且隨時袍禛懷珠人未知燕雀既羣難立志
鳳凰不至擬胡為可嗟世態頻更變何奈人生多別離

莫忘天山風雪裏湛然駝背和君詩

余昨至沙井乘牛車過前路跨駝方

達行在偶得駢句一聯云牛車馳傳頗異相如
駟馬車駝背吟詩不似竹林七賢畫因有是句

再過晉陽獨五臺開化二老不遠迎

高岡登陟馬玄黃落日西風過晉陽
道士歡迎捧林果
儒冠遠近挈壺漿五臺強健頭如雪
開化輕安鬢未霜
誰會二師深密意趙州元不下禪牀

過清源謝汾水禪師見訪


汾水禪師個裏人杖藜尋我過清源
半盃紅果情何厚
一盞清燈話細論山水景中君得意
兵戈堆裏我銷魂
他年相約雲深處松竹蕭蕭靜掩門

王屋道中

勝克河中號令齊
神兵入自太行西
昏昏烟鎖天壇暗
漠漠雲埋玉屋低
風軟却教冰泛水
一作冰
解凍寒輕還使
雪成泥
行吟想像覃懷景
多少梅花坼玉溪

湛然居士集卷二

謹案卷一第一頁後二行耶律舊作移刺今改後
倣此



總校官進士臣胡榮

校對官原任編修臣勵守謙

謄錄監生臣于時和

欽定四庫全書薈要

集部

湛然居士集卷三

五

詳校官助教臣謝登雋



欽定四庫全書薈要卷一萬六千一百五

集部

湛然居士集卷三

元 耶律楚材 撰

和解天秀韻

用萬松老人韻作十詩寄鄭景賢

萬松老人真贊

贈萬松老人琴譜詩一首

寄曲陽戒壇會首大師

和王巨川韻



釋奠

和耶律子春見寄五首

寄耶律國寶

寄鄭景賢十首

和景賢韻三首

和李世榮韻

和景賢十一首

和王君玉韻

過東勝用先君文獻公韻二首

過夏國新安縣

過青塚用先君文獻公韻

過青塚次賈搏霄韻二首

再用韻以美搏霄之德

再用韻自嘆行藏

再用韻感古

再用韻唱玄

過雲川和劉正叔韻

過雲中和張伯堅韻

過雲中和張仲先韻

過雲中和王正夫韻

過白登和李振之韻

過天城和靳澤民韻

過武川贈布薩令人

過燕京和陳秀玉韻五首

還燕京題披雲樓和諸士大夫韻

和威寧珍上人韻

和李德修韻

和解天秀韻

猛士彎弓挽六鈞長驅下汴政施仁前朝運謝山河古
聖世時亨雨露新未遇自甘焚綠綺知音不必惜陽春
朝廷將下搜賢詔莫戀煙霞老此身

用萬松老人韻作十詩寄鄭景賢

羶廬同抵足談道月西沉
議論馨香發文章蘊藉深
正便邊氏腹不上謫仙襟
自得逍遙意何須泊鄧林

其二

豐城三尺劍神器尚埋沈
確論穿楊的生機劈筭深
天真貯便腹浩氣塞征襟
竚看澤天下清風冠士林

其三

破船無滲漏流水不能沈
露鎖青山秀花藏古徑深
白雲陪野興晴月洗煩襟
絕後重甦息飛花枯木林

其四

隱隱三星出依依片月沉
鶴飛遼海闊猿嘯楚山深
柳色雲霑袖蘆花雪滿襟
普天秋意露一葉墜梧桐

其五

玄珠羅帳密寒鼎篆煙沉
翡翠踈簾隔琉璃古殿深
本來無垢體何必拂塵襟
斫却蟾中桂方成般若林

其六

鰲餌不須針聊將玉線沉
須彌猶未大渤海豈為深
悟

後牛穿鼻迷時馬有襟
戈人何所慕幽鳥在高林

其七

箇事不容針迷途自陸沉
西天三步遠東海一盃深
涼月盛玄鉢輕雲翦素襟
曹溪無一滴波浪沸禪林

其八

流波無放蕩死水暮平沉
機盡方鈎隱綸空正釣深
赤心休借口青眼好開襟
誤捉溪中月人人似翰林

其九

夢覺方知錯生平自屈沉滌塵千澗外遺照亂松深柳
帶縫穿屣荷衣綴破襟寂寥選佛味何似宴瓊林

其十

漁家何足好乘興一鉤沉路僻蒼苔滑舟橫古渡深小
晴掀弱笠微雨整蓑襟夢斷知何處寒朝沒晚林

萬松老人真贊

昔無盡居士題恒嶽廟云聰明厭血食悔不值元
珪茲因恒州四衆敦請萬松老師師不行且以頂

相付之門弟湛然居士再拜而贊之曰

每恨恒山不逢珪老四衆同緣萬松親到

萬松老人琴譜詩一首

萬松索琴并譜予以承華殿春雷及種玉翁悲風
譜贈之

良夜沉沉人未眠桐君橫膝叩朱絃千山皓月和煙靜
一曲悲風對譜傳故紙且教遮具眼聲塵何礙汚幽禪
元來底許真消息不在絃邊與指邊

寄曲陽戒壇會首大師

四衆飛書請萬松不消彈指已成功
燈籠證據真談辨露柱承當不耳聾
梵行細推無處所戒壇須信塞虛空
無為濟物誰能悉惟有東垣月拂風

和王巨川韻

聖駕徂征率百工貔貅億萬入關中
周秦氣焰如雲變唐漢繁華掃地空
灞水尚存官柳綠驪山唯有驛塵紅
天兵一鼓長安克千里威聲震陝東

釋奠并序

王巨川能於灰燼之餘草創文宣聖廟以己丑二月八日丁酉率諸士大夫釋而奠之禮也諸儒相賀曰可謂吾道有光矣是日四衆奉迎釋迦遺像行城歡聲沸沸僕皆預其禮作是詩以見意云

多士雲奔奠上丁釋迦遺像亦行城旌幢錯落休迷色
鐘磬鏗鏘豈在聲宣父素心施有政能仁深意契無生
儒流釋子無相諷禮樂因緣盡假名

和耶律子春見寄五首

四海皇皇足俊賢，浪陪扶日上青天。且圖約法三章定，寧羨浮榮六印懸。潤色吾儒惟恐後，扶持天下敢為先。過情聲聞予深恥，可笑虛名到處傳。

其二

生遇干戈我不辰，十年甘分作俘臣。施仁發政非無據，論道經邦自有入。聖世規模能法古，汚俗習染得維新。英雄已入吾皇彀，從此無人更問津。

其三

且喜朝廷先正名林泉隱逸總公卿羣雄一遇風雲會
萬國咸觀日月明丹鳳固應潛亂世白麟自合出昇平
竚者一作顯觀北闕垂溫詔夜半前席進賈生

其四

舉世寥寥識我誰未學弓矢愧由基衰年有幸彈三樂
盛世無才出六奇棄物且存光海量散材獲用荷天私
微臣自忖將何報信筆裁成頌德詩

其五

邂逅沙城識子初，天山風雪醉吟餘。
文章光焰君堪羨，節操儀刑我不如。
麴蘖鄉中前進士，

渠有詩云老去惟耽麴蘖春故有是

句風波堆裏老中書，他年歸去無相棄。
同到閭山舊隱居。

寄耶律國寶

昔年萍迹旅京華，曾到風流國寶家。
居士為予常喫素，先生愛客必烹茶。
明窓揮麈談禪髓，淨几焚香頂佛牙。

公所藏佛
牙甚靈異

回首五年如一夢
夢中不覺過流沙

寄鄭景賢十首

龍岡能覓淡中歡
心與孤雲自在閒
琴阮生涯事松菊
詩書活計老丘山
叩絃聲自無中出
得句詩從天外還
踏破化工無盡藏
閒人受用亦非慳

其二

龍岡漆水兩交歡
縱意琴書做老閒
未得一言安海內
已輸三箭定天山
肯容詩思妨心慧
豈使聲塵礙耳還

信手拈來無不是清風明月有何慳

其三

人間聚散妄悲歡何似林泉遯世閒十載殘軀遊瀚海
積年歸夢遶閭山

先人舊隱居也

空崑猿鶴招予往滿架琴書

伴我還多謝龍岡怜老隱新詩酬酢路無慳

其四

絃索詞章且助歡羨渠臨老得安閒琴歌愛子彈秋水
詩句服君仰泰山聲古調淒真可聽辭雄韻險實難還

先難後易今方省居士襟懷本不慳

其五

宦情觸處不成權未得浮生半日閒
薦鴉有書慚北海澤民無術愧東山
琴書習氣終難忘品麓荒園怎得還
卜隱龍岡成老伴肯教詩思筆頭慳

其六

廣文怜我失清歡每著琴詩伴我閒
痛憶金聲并玉振酷思流水與高山
詩壇各晉猶深閉琴債遷延未肯還

一狀如今都領過龍岡須破兩重慳

其七

琴書吾子盡幽歡隨分消磨日月閒佳句典型傳四海
水仙聲韻徹三山每慚木李投君去却得瓊瑤報我還
從此龍岡開廩藏薇邊筆下更無慳

其八

世間何事最為歡爭似能偷忙裏閒得遇夜晴須對月
每逢春盛彊登山無錢沽酒和衣典

一作和
琴典

圖利吟詩

倍本還綺語千章琴百曲莫教風月笑人慳

其九

我與先生久已歡而今皆願老來閒同舟載棹醉觀月
並轡騎驢飽看山綺句綴成連譜換純音彈了着詩還
琴詩此際慵拈出可怨龍岡為紙慳

其十

閒人閒裏竟閒歡未得迴光未是閒叩道一螺斟巨海
參玄千里望恒山但能透鏃穿三語何必拖泥辨八還

箇事人人皆富有含生休怨釋迦慳

和景賢韻三首

龍岡便腹盡詩書落筆雲烟我不如一紙安書思塞鴈
十年歸興憶鱸魚託身醫隱君謀妙委跡儒冠我計疎
何日相將歸故里翠微深處卜幽居

其二

龍岡走筆和清篇出示珠璣寄湛然字古意新看不足
挑燈寒雨夜無眠

其三

摩撫瘡痍正似醫微君孰肯拯時危萬全良策悟明主
厚德深仁四海施

和李世榮韻

異同誰定據俯仰且隨緣居士難聯句梅軒却解禪無
雲皆皓月何處不青天話到忘言處迢迢夜不眠

和景賢十一首

龍岡居士得賢君聞道賢君增所聞節操鷓鴣捐鼠餌

風神野鶴立雞羣只知輔嗣能談易誰識相如善屬文
擬欲贊君言不盡區區微意見詩云

其二

天下奇才鄭使君清名不使世人聞五車書笥獨窮理
三峽詞源迥出羣未得開懷重話舊常思抵足共論文
自從一識龍岡老餘子紛紛不足云

其三

一聖龍飛敢擇君嗟予潦倒尚無聞蒼生未識鴻鵠志

皓首甘遊麋鹿羣黃雀已歸奚望報彩禽飛去不能文
龍岡特慰孤窮悶時有新詩報我云

其四

試和新詩寄鄭君無顏談道不聞聞治心更索捐中道
養性渾如鞭後羣玄語諄諄非是說真書歷歷不關文
儒生束教嫌虛誕得意忘言孔子云

其五

文章自愧不如君敢以玄言瀆所聞有道居塵何異俗

無心入獸不驚羣重立消息無多子半紙功名直幾文
回首死生猶是幻自餘何足更云云

其六

韻換

十年不遇一相知恰識龍岡恨見遲常愛箕山能洗耳
何堪鄰舍效顰眉禁枯貴賤難逃數用舍行藏自有時
心事紛紛無處說援毫閒和景賢詩

其七

感事

萬里西來過月氏初離故國思遲遲人情慚愧三鬚面

世態梳粧半額眉
田上野夫空嘆鳳
澤邊漁父不傷時
龍岡本具英雄眼
幾倩東風寄我詩

其八

讀唐史有感

林甫滔天聖不知
三郎深恨識卿遲
塵中妃子春羅襪
錢上開元指甲箸
七夕殿中祈巧夜
三秋原上摘瓜時
長天忽見飛來鴈
垂淚空吟李嶠詩

其九

李楊相繼領台司
兵起漁陽禍已遲
向昔正憐花解語

而今空憶柳如眉
心傷桃李初開後
腸斷梧桐半落時
試問宮中誰第一
三郎猶記謫仙詩

其十

往來寒暑暗推移
下手修行猶太遲
迷後徒勞常捏目
悟來何必更揚眉
宗門淘汰宜窮理
道眼因緣貴識時
祇為龍岡心猛利
湛然剛寫不言詩

其十一

龍岡醫隱本知機
薰蕕同盤識者稀
廊廟虛名無意戀

林泉夙願與心違，羨君綽綽有餘裕。笑我皇皇無所歸，尚憶當年垂釣處。一江烟雨靜霏霏。

和王君玉韻

王孫蒙饋飯靈輒，未扶輪自笑孤窮。客誰憐衰病，身黃沙萬餘里，白髮一孀親。腸斷山城月，徘徊照遠人。

過東勝用先君文獻公韻二首

荒城瀟灑枕長河，古寺碑文半滅磨。青塚路遙人去少，黑山寒重鴈來多。正愁曉雪冰生硯，不忿西風葉墜柯。

偶憶先君舊遊處潜然不奈此情何

其二

依然千里舊山河事改時移隨變麼巢許家風烏可少
蕭曹勲業未為多可傷陵變須耕海不待碁終已爛柯
翻手榮枯成底事不如歸去入無何

過夏國新安縣

時丁亥九月望也

管年今日渡松關

西域陰山有松關

車馬崎嶇行路難瀚海潮

噴千浪白

一作千里雪

天山風吼萬林丹氣當霜降十分爽

月比中秋一倍寒回首三秋如一夢夢中不覺到新安

過青塚用先君文獻公韻

漢室空成一土丘至今仍未雪前羞

一作可惜冰姿瘦
古丘佳人猶自夢

羞中不禁出塞陟沙磧最恨臨軒辭冕旒幽怨半和青塚

月閒雲常鎖黑河秋滔滔天塹東流水不盡明妃萬古
愁

過青塚次賈搏霄韻二首

當年遺恨嘆昭君玉貌冰膚染塞塵邊塞未安嬪侮虜

朝廷何事拜功臣朝雲鴈唳天山外殘日猿悲黑水濱
十里東風青塚道落花猶似漢宮春

其二

延壽丹青本誑君和親猶未斂胡塵穹廬自恨嬪戎主
泉壤相逢愧漢臣玉骨已消青塚底香魂猶繞黑河濱
愁雲暗鎖天山路野草閑花也怨春

再用韻以美搏霄之德

去歲雲川始見君澄澄胸次淨無塵斗南第一珪璋士

冀北無雙柱石臣

公領師職故云

萬頃雲松斜谷外千竿水竹

渭河濱他年歸隱重相訪無影林間別有春

再用韻自嘆行藏

箕裘家世忝先君慚愧飄蕭兩鬢塵自古山河歸聖主
從今廊廟棄愚臣常思卧隱雲鄉外肯傲行吟澤國濱
驛使不來人已老江南誰寄一枝春

再用前韻感古

宣尼名教本尊君賊子常干犯蹕塵鹿失羸秦無令主

鼎分炎漢有能臣
宋朝南渡尤天水
遼室東傾罪海濱
回首興亡都莫問
不如沈醉瓮頭春

再用韻唱玄

重玄不惜說知君
又恐重添眼裏塵
臨濟喝中分主客
洞山言下辨君臣
持鈴普化搖空裡
垂釣華亭沒水濱
勘破這般閑伎倆
鐵林花發劫前春

過雲川和劉正叔韻

西域風塵汗漫遊
十年辜負舊漁舟
曾觀八陣雲奔速

親見三川席卷收煙鎖居延蘇子恨雲埋青塚漢家羞
深思籬下西風醉誰羨班超萬里侯

過雲中和張伯堅韻

一掃氐羌破吐渾羣雄悉入北朝吞自憐西域十年客
誰識東丹八葉孫射虎將軍皆建節龍飛天子未更元
我慚才畧非良器封禪書成不敢言

過雲中和張仲先韻

致主澤民本不難言輕無用愧偷安十年潦倒功何在

三徑荒涼盟已寒
岩下藏名思傳說
林間談道謁豐干
挂冠神武當歸去
自有夔龍輔可汗

過雲中和王正夫韻

白雪陽春寡和音
誰人解聽沒絃琴
詩書事業真堪笑
刀筆功名未可欽
不信西天三步遠
焉知東海一杯深
元來佛法無多子
何必嵩山謁少林

過白登和李振之韻

十年淪落困邊城
今日龍鍾返帝京
運拙不須求富貴

時危何處取功名騰驤誰識孫陽驥俊逸深思支遁鷹
客裏逢君贈佳句知音相見眼偏明

過天城和靳澤民韻

西征扈從過龍庭誤得東州浪播名琴阮因緣真有味
詩書事業拙謀生咄嗟興廢悲三歎倏忽榮枯夢一驚
何日解官歸舊隱滿園松菊小菴清

過武川贈僕散令人

班姬流落到而今聞道翻身入道林歌扇舞裙忘舊業

藥爐經卷半新吟
閒眠白晝三杯醉
靜對青松一曲琴
更看他年棲隱處
蓬山樓閣五雲深

過燕京和陳秀玉韻五首

回首親朋半土丘
嗟予十稔浪西遊
半生兵革慵開眼
一紙功名暗點頭
下士笑予謀生拙
至人知我謂心憂
再行不憚風沙惡
鶴跡雲蹤任去留

其二

君恩猶未報山丘
自笑遐方汗漫遊
客過玉關驚白髮

要遊金谷覓蒼頭冷官待罪予為歎陋巷居貧君不憂
猶望道行澤四海敢辭沙漠久淹留

其三

狐死曾聞尚首丘悲予去國十年遊崑崙碧聳日落處
渤海西傾天盡頭君子云亾真我恨斯文將喪是吾憂
尚期晚節回天意隱忍龍庭且彊留

其四

餘生不得樂林丘猶憶丁年選勝遊幾帙殘編聊映眼

一張衲被且蒙頭
貔貅已報西門役
柱石猶懷東顧憂
自料荒疎成棄物
菟裘歸計乞封留

其五

空驚滄海變陵丘
白晝分明夢裏遊
除妄楔邊重出楔
求真頭上更安頭
亨通富貴剛生喜
苦惱悲愁彊作憂
斫斷葛藤閑伎倆
繫驢橛子不須留

還燕京題披雲樓和諸士大夫韻

閨上披雲第一重
離離禾黍漢家宮
窻開青瑣招晴色

簾捲銀鈎揖曉風好夢安排詩句裏閒愁分付酒杯中
靜思二十年間事聚散悲歡一夢同

和威寧珍上人韻

十載西遊志已灰南征又自大梁迴扶持佛日慚無力
贊翊皇風愧不才舊約未能林下去新詩常寄日邊來
何時杖屨烟霞裏一笑伸眉得共陪

和李德修韻

明明聖主萬邦君神武彫弓挽六鈞時有逸人遊闕下

更無騷客弔江濱
衣冠師古乘殷輅
歷日隨時建夏寅
厚德深仁施萬世
巍然一代典謨新

湛然居士集卷三